

左文襄公奏疏

第一函
第十冊

左文襄公奏疏續編目錄

卷六

奏凝條梁收復米脂榆林擊退竄賊摺

奏宜君縣被陷收復片

奏吉林馬勇抵陝擬從新整理摺

奏催解四川河南山西鉛礮片

奏捻竄北山現籌剿辦摺

奏捻逆分股狂奔截剿疊勝摺

奏各軍剿回獲勝甯州解圍正甯等縣甫失旋復摺

奏和厚兩營失利遏捻東竄摺

奏騎賊闖入安塞片

覆陳甘肅餉事通籌陝甘全局摺

奏陝甘撫局勢難敷衍片

奏遵 旨覆陳摺

左文襄公奏疏續編卷六

奏凝條梁收復米脂榆林擊退竄賊摺

同治六年十一月初一日

奏爲查明凝條梁被賊闖入旋即收復米脂榆林各府縣擊退撲城之賊據實馳陳仰祈

聖鑒事竊

凝條梁鎮被賊陷踞行查敦奇祥阿各軍實在下落經

臣

等先後馳陳九月十七日據凝條梁巡檢李夢

蘭申報八月初二日夜半探報距梁西南四十里泥梁子有回匪竄擾駐梁之統帶黑龍七起官兵記名

副都統敦奇祥阿副將銜儘先遊擊蕭明發共圖守禦蕭明發分堵西南三口敦奇祥阿分守東南三口

初三日辰刻大雨馬賊二千餘步賊七八百鋒擁而來蕭明發督隊轟擊馬賊從東南巷衝焚殺搜搶敦

奇祥阿不能禦蕭明發所部帶傷甚多遣人求援於敦奇祥阿不應適記名副都統薩斌圖率馬隊數十

蒙兵數百名馳來策應蕭明發與合隊衝擊賊始敗退凝條梁初四日已刻賊復來撲營蕭明發禦之南

街駐安邊之營總參領托雲佈聞警馳來同薩斌圖各率所部馬隊衝擊追殺十餘里殺賊數十名奪回

器械牲畜甚夥是夜托雲佈仍回安邊初六日駐紮定邊之記名副都統貴陞帶兵到凝條梁人心始定

此凝條梁被賊闖入並未盤踞之實在情形也其攻撲米脂榆林府縣城池之賊八月初七日竄擾米脂

龐家一帶初八日辰刻騎賊數百直撲縣城知縣張守基督團守禦賊知有備未敢近逼初九日黎明賊

馬步千餘復撲西南北三門城上鎗礮轟擊斃騎馬賊數名賊即退卻已刻延榆綏鎮陶茂森派署左營

遊擊楊樹棠帶兵自南路趕到城中團練亦啟東門出戰賊向西北沿山而竄十三四等日擾及榆林縣南之鎮川魚河等堡十五日馬步賊由東南而來分兩路撲城城上槍礮轟擊賊卽卻退十六日已革遊擊李允芳由米脂追賊而來已抵下鹽灣榆林縣知縣嚴書麟會同署中營遊擊牛玉林率兵勇出城會剿敗賊於歸德堡賊遂西竄懷遠縣境適李允芳帶前隊行抵魚河堡西南遇賊龍耳岸後隊續至擊敗之賊竄米脂懷遠交界之武家坡白家岔一帶懷遠縣知縣劉昌蕃率鄉勇扼之馬道嶺賊仍回竄小里河石灣等處二十七日有賊千餘竄至石雲坪帶勇童生劉方軌孔昭勛等及團紳魯述周方守正等率團勇擊之賊敗回石灣劉方軌孔昭勛等躡蹤緊追二十八日抵臥牛城前起團勇截其去路後起馳至夾擊斃賊數百奪獲駝騾十五隻驢一百一十餘頭馬十九匹羊一千三百餘隻洋槍三桿烏槍二十餘桿旂幟六十餘件搜獲江湖哥老會盟單驗視皆兩湖江西川黔勇丁從甘肅潰回者此米脂榆林先後擊退撲城賊匪懷遠團勇截剿竄賊之實在情形也臣等竊維陝西北山之賊均由甘肅而來固原土匪及各饑潰勇丁相與勾結間有回匪夾雜其中馬賊多而步賊少四出剽掠踪跡飄忽幸皆無甚伎倆地方文武能憑城固守將弁肯盡力剿截不難就地殲除惟其地邊遠荒瘠迴殊內地營兵餉匱已久名存實亡客軍遠道援剿不能隨地徵糧轉饋則勞費萬狀仍難尅期必至非俟大局粗定不能全力注之此時兵事餉事實難兼顧然揣度情形尙不至遽貽晉邊之害也凝條梁之變亦多係土匪潰勇勾通回匪

所致僅祇被闖入劫掠旋即擊退並未盤踞因地居邊外傳聞異詞故文報每多失實現有官軍鎮壓當無他虞臣宗棠前調記名提督劉厚基由延川取道綏德米脂馳往剿辦現在地方安靜毋庸前往仍飭其暫防宜君白水一帶以重鄜防而預遏捻逆北竄之路其米脂綏德榆林守城擊賊各文武官紳容臣等核明彙案酌保數員懇恩獎勵其凝條梁帶兵各員功過攸分應由穆圖善查明辦理謹據實馳

陳伏乞

皇太后

皇上聖鑒訓示謹

奏

奏宜君縣被陷收復片

同治六年十一月初一日

再記名提督劉厚基自肅清延鄜交界各縣後駐軍鄜州八月初二日忽接探報土匪兩三千自甘肅合水縣竄至劉厚基卽帶隊往剿行至羌村適與賊遇賊見官軍倏至駭而奔劉厚基扼至山峽縱兵擊之擒斬五六百名奪獲騾馬匹數百餘匪仍由孤掌窪竄回老巢初四日接洛川縣報回逆二千餘由中部縣境渡惠家河而來所部駐防中部之總兵張榮華探悉竄中步之賊約兩股其由宜君縣苦泉坪楊家店焦家坪竄來之賊尙在後未至均甘肅甯州回逆也適連日大雨山水暴漲不能拔營十八日啟行至交口阻水不前二十日渡河二十一日途次接張榮華稟報是日出隊至四聖村遇騎賊千餘鏖戰竟日擒斬二百餘奪獲牲畜軍械旗幟甚夥二十四日劉厚基馳至牛湖嘴與賊僅隔一溝是夜踰溝潛襲各堡之賊斃賊百餘二十五日督隊踰溝甫上山梁該逆卽分數股前來抗拒劉厚基分三路衝擊更番

接仗鏖至半日斃賊頗多而賊仍不退乃用開花礮轟其中堅賊始大潰官軍乘之殲賊約數百名生擒百餘名奪騾馬牛驢數百頭追至厚子坪始行收隊餘賊仍由雙柳竄回老巢訊據生擒回逆劉元賽文志等供如此次由甘肅甯州竄來回逆共兩股此股係馮正剛爲首回中呼阿渾者也尙有一股係余阿所帶已由楊家店焦家坪竄犯宜君矣劉厚基訊決後卽傳令拔隊援宜君二十六日行至中途聞宜君縣城已於二十五日辰刻被賊闖入知縣張杰遇害賊偵官軍將至旋卽由楊家店退向甯州老巢去矣劉厚基二十七日未刻馳抵縣城廩生屈朝海王家駿襄創來見詢知署宜君營參將花翎都司秀順典史胡光煦馬蘭巡檢徐廷俊等均尙在城隨卽遣覓秀順則過體刀矛重傷偃臥北門城樓不能起立細詰失陷之故因久雨城垣坍塌十三處約共二百餘丈知縣張杰稟請修築適連日陰雨尙未開工而賊已迫近張杰因縣無存糧不肯請兵惟募馬蘭勇丁百名入城防守勇首郭大順暗與回逆引回逆由缺口闖入回逆入城搜掠財物旋卽倉皇遁走劉厚基留張榮華一營駐守捕治叛勇正法此宜君縣城被回逆闖入旋卽收復之實在情形也臣等查宜君縣城素稱苦瘠八月以來大雨兼旬城垣坍塌過甚當回匪竄撲時知縣張杰因無糧供應未及請兵叛勇內應遂致被賊闖入比劉厚基聞警馳至則已無及宜君縣知縣張杰被戕情形甚爲慘烈應請

旨飭部照例議卹以慰忠魂署宜君營參將都司秀順

櫻城固守身受刀矛重傷二十餘處比劉厚基馳至秀順尙在北門城樓實與尋常營員失守迥異應請

旨革職暫留署任以示區別其餘文武應歸另案查辦所有宜君縣城池被賊闖入旋即收復情形謹據實附片馳陳伏乞 皇太后 皇上聖鑒施行謹 奏

軍機大臣 字寄同治六年十月初七日奉 上諭左宗棠等奏查明凝條梁收復米脂榆林擊退賊匪並宜君縣城失守後收復情形各摺片凝條梁被賊攻撲闖入街巷敦奇祥阿不能抵禦蕭明發請援時又不能救經薩斌圖等奮力衝擊賊始敗退本日已諭令穆圖善將該員等功過核實查明分別奏辦矣米脂榆林撲城之賊雖經陝省兵勇擊退惟北路餘匪尚未殄盡左宗棠等當督飭地方文武實力殲除不可稍存大意宜君城垣於失守後經劉厚基馳往收復惟陷城之賊並未被剿先期遁歸甯州難保其不去而復來與捻匪勾結著左宗棠喬松年分派兵勇於郵延交界一帶嚴密扼截毋任回竄宜君縣知縣張杰臨難捐軀殊堪憫惻著交部議卹都司秀順被傷甚重著革職留營免其議罪左宗棠另摺奏新募吉林礮手冗雜不堪應用等語此項馬隊沿途逃逸甚多馬匹亦多倒斃本日已明降諭旨將原募草率之富明阿議處矣其帶兵之員沿途未能約束亦難辭咎著左宗棠查明參處現在存營勇丁仍著該大臣酌挑選擇其尙堪適用者留營訓練其餘概行裁撤責成派出之員管帶回旂毋任仍前逃逸陝省剿捻情形現在若何著該大臣隨時馳奏以慰廑係將此由六百里各諭令知之欽此

奏吉林馬勇抵陝擬從新整理摺

同治六年十月初一日

奏爲吉林馬勇齊抵陝省現擬從新整理恭摺馳陳仰祈

聖鑒事竊

臣前奏調吉林礮手二千五百

名帶解察哈爾採購馬三千匹入陝助剿荷蒙

聖慈俞允七月二十八日潼關營次欽奉

寄諭

長善奏吉林現募赴陝勇丁良莠不齊請飭左宗棠等密查等語吉林應募勇丁本非實業獵戶現據長

善聲稱內多直隸山東游民永平府屬又居其大半沿途逃散頗多進關以後潛逸更衆恐有馬賊餘黨

錯雜其間此次勇丁到陝後應如何約束駕馭俾無生事之處著左宗棠妥慎籌辦欽此跪聆之餘深爲

失望是日馬勇頭起至潼關八月初九九月初四初九十一等日後四起始陸續入陝

臣

於潼關及臨潼

營次接見吉林將軍富明阿所派副統領常林正統領桂廉各起營總札蘭員詢知馬匹沿途倒斃及病

廢寄養各州縣報斃者數逾一半現僅存馬千餘尙陸續報斃勇丁二千五百名除沿途逃走數百名現

到陝省者礮手不過四百有奇此外老弱疲乏吸食洋烟不習騎者不知其數聞各營總在途亦有收留

補缺者

臣

見其不堪赴戰暫令駐紮省關先委已革都統銜前護軍統領常星阿點驗分別等第俟

臣奏

派分帶之記名副都統喜昌到營再令與常星阿妥籌辦理長善所奏慮其良莠不齊致添馬賊具見其

顧全大局深心惟

臣

所苦者富明阿所募勇丁既如此冗雜不堪是非駕馭約束之難而從新整理汰留

訓練之尤難也詢據各營總僉稱吉林將軍副都統派充營總時並未令隨同選募所有勇丁均係臨時

招湊派歸管帶迫促登程數日後始將勇丁花名冊發給不但良莠難分卽姓名籍貫真假亦未及查認

臣昨訊決搜搶民人財物之吉林二起馬勇崔萬三遍查冊籍並無其名再四研訊始知卽冊名之崔保山卽此可見原募之草率至軍裝一項尤關緊要現五起勇丁所携器械均不適用鞍鐙靴屨亦不齊全及閱所造送軍裝冊內湊列抬槍一項尤非馬隊所需遠道携將徒滋重累夫以數千里外徵調之軍糜十餘萬兩至艱之餉竭沿途數十州縣供億之力而乃得此二千有奇冗雜疲乏不堪征戰之卒現在坐食需費將來汰遣需費當茲糧餉奇絀之際何以堪之富明阿若肯稍爲盡心庸遽謬率至此況前奉諭旨儘數挑選不必拘定二千五百名之數細心訪查不可以無業游民充數致滋流弊 明訓洞燭幾先尤當懷遵乎 臣與富明阿未曾共事前頗聞其在江南軍營時性情乖謬故此次請調吉林礙手懇飭德英一手經理富明阿或因此心存芥蒂惟既銳以自在自當以軍務爲重豈宜掉以輕心此則不能爲富明阿解者也所有吉林馬勇到陝日期及從新整理難以趣戰實在情形謹據實直陳伏乞 皇太后 皇上聖鑒訓示謹 奏

同治六年十月初七日內閣奉 上諭左宗棠奏吉林馬勇齊抵陝省現擬從新整理一摺吉林所募馬隊沿途逃散甚多人頗冗雜不但良莠難分卽姓名籍貫多致舛錯軍械鞍轡亦不齊全吉林將軍富明阿辦理草率著交部議處欽此

奏催解四川河南山西鉛礮片 同治六年十月初一日

再上年十二月奉

諭旨飭四川趕辦黑鉛十二萬觔由陝省委員前往接運嗣經委員往領迄今尙

未報解又河南山西各協陝省硫磺每月五千觔自四年九月起截至本年九月止河南欠解十二萬觔山西欠解七萬觔鉛磺兩項陝省素不出產現值攻剿喫緊之際需用尤殷陝局往往因鉛磺缺乏停工待造臣軍所需向由鄂省後路糧台購料製造因水陸程途迢遞二千餘里轉運極艱實難如期解濟亟應由陝省就近製造俾免缺乏相應請 旨飭下四川河南山西督撫臣將欠解陝西鉛磺迅速如數辦解並河南山西兩省將以後應解鉛磺觔按月批解以資配造而利攻剿謹附片陳明伏乞 聖鑒施行謹 奏

軍機大臣 字寄同治六年十月初七日奉

上諭左宗棠奏請飭催欠解鉛磺等語本日據駱秉章

奏應解陝省黑鉛二十萬觔業已如數撥解惟河南山西每月應各協陝省硫磺五千斤自四年迄今河南共欠解十二萬斤山西欠解七萬斤陝省現值攻剿喫緊之際需用尤急豈可令鉛磺缺乏停止待造著李鶴年趙長齡即將欠解陝西鉛磺迅速如數辦解並將以後應解磺斤按月批解不准再有宕延左宗棠於鉛磺解到後即著趕緊製造以利攻剿將此由五百里各諭令知之欽此

奏捻竄北山現籌剿辦摺

同治六年十月十三日

奏爲官軍大舉逼圍捻逆竄入北山現籌剿辦情形恭摺馳陳仰祈

聖鑒事竊自八月二十六日以

後捻逆由三原富平之間竄擾高陵及臨潼渭南各縣北岸各村堡雨後零騎四出覓食兼窺河岸大股未得竄動官軍苦爲雨阻亦未克進兵九月初一初二初六等日大雨不止軌輒不通薪糧告匱臣宗棠檄主客各軍之在西路者先就涇河西岸浚濠削坂杜賊回竄之路十一日輕騎赴涇西各軍面與臣劉典廣東陸路提督劉松山安徽壽春鎮李祥和前提督銜記名總兵郭寶昌甘肅提督高連陞按察使銜陝西補用道黃鼎商議方略以提督蕭德經總兵羅洪德於奇泮副將王其發參將劉竹田遊擊劉德良各營與黃鼎一軍分扼涇河西岸北自白陵谷山脚起迤東而南至涇河入渭處止又飭提督劉效忠一軍扼耀州山口皆倚山憑水築壘浚濠以重後路營壘甫成臣劉典卽與劉松山李祥和郭寶昌高連陞各軍渡涇進剿十四十五十六等日大雨傾注官軍冒雨覓渡三日始渡畢臣宗棠於十五日回臨潼營次臣劉典與高連陞兩軍十六日齊抵高陵劉松山李祥和郭寶昌亦至三原賊見西路各軍進逼大股潛移臨潼渭南富平蒲城交界之瀆鹽灘遊騎自臨潼北岸至華州北岸上下窺伺見南岸防軍嚴密勢難偷渡乃圖拚死衝突復向西竄二十二三等日臣劉典復與高連陞復由雨金鎮進紮相橋康橋一帶賊騎倏前倏後時相窺擾比官軍出隊排擊則復鼠竄而去劉松山李祥和郭寶昌各軍同時由北面進駐富平自二十一日至二十六日大雨以風官軍不能遽進乃修浚雷村順陽河牛村母豬河康橋一帶水陸牆濠於富臨屬境設第二重關鎖賊見西路官軍日逼度不得脫遂鋌而走險二十七日雨止遂由

蒲城東南一帶北趨北水竄入北山

臣

劉典與高連陞率所部趨耀州前隊甫抵同官賊騎已薄中部矣

先是臣宗棠以北山荒瘠殊甚非賊所注意特慮被剿窮竄或冒險深入檄提督劉厚基鄜防各軍南下

截之頃據劉厚基馳報十月初三日中部擊賊初四日洛川擊賊皆獲勝仗現在賊蹤自洛川延紮至鄜

州城西五里張村占地約近百里劉厚基於鄜州甘泉力扼其北竄延綏之路

臣

劉典與高連陞率所部

進耀州前隊已抵同官高連陞及提督銜總兵劉端冕率輕騎追之此十月初五日以前賊被逼窘感竄

入北山之實在情形也

臣

等竊維捻逆所恃者萬馬縱橫利於平地茲經官軍進逼鎗走北山已失其飄

忽慣技惟秦省兵燹之後蓋藏久已罄竭無糧可裹北山荒瘠殊甚又不能就地徵糧各軍入山追逐必

先於山外採儲以供携取現已飭廣爲購運并加給各統領行賞便其沿途自行覓買以利進行察看賊

蹤趨向不外北竄西竄兩途西竄則必於三水邠涇一帶折而南奔其患在蜀在鄂臣劉典及高連陞黃

鼎等軍截之北竄則必由鄜延綏榆一帶折而東趨其患在晉記名提督劉厚基截之廣東提督劉松山

壽春鎮總兵李祥和總兵郭寶昌追之如賊敢窺渡黃河劉松山郭寶昌卽渡河入晉助晉軍截剿劉厚

基仍留河之西岸以固秦疆務將此起巨寇悉數殲除免釀異禍

臣

等惟有殫誠盡力慎以圖之斷不敢

稍涉迂回致誤大局已將調度情形咨行山西撫

臣

及山西臬司陳湜協辦大學士四川督

臣

駱秉章四

川防軍提督周達武矣所有捻逆竄入北山現在籌辦情形謹據實馳陳伏乞

皇太后

皇上聖

鑒訓示施行謹 奏

軍機大臣 字寄同治六年十月十九日奉 上諭左宗棠奏擒逆竄入北山現籌剿辦情形一摺擒逆經官軍大舉進逼遁入北山勢必由鄜洛上竄延綏該處荒瘠殊甚非賊所注意恐藉此東趨晉山西西路沿河一帶在在與陝省毗連防務喫緊轉瞬河流冰凍尤爲可慮著趙長齡督飭在防將士扼要嚴守並著飭令陳湜相機兼顧沿河船隻悉心提歸東岸毋稍疏忽賊騎倘渡河而東則蔓延綏榆勢將靡所底止豈劉松山郭寶昌兩軍所能殄盡晉省爲畿輔屏蔽左宗棠當如何力籌兼顧陝省兵力不爲不厚總當就地殲除不可以驅賊出境卽爲了事倘任賊東渡闖入晉疆惟左宗棠是問劉厚基一軍兵力尙單截賊恐未盡得力左宗棠庫克吉泰喬松年劉典當熟商機宜妥籌調度潼商一帶亦宜嚴密布置以防擒逆回撲由此出關邠涇一路並著分撥得力將士加意嚴防毋任賊由西南竄出繞逸川鄂蜀省北路及楚北襄鄖一帶著略秉章李瀚章等各添兵勇分路扼守以固邊境將此由六百里諭知左宗棠略秉章庫克吉泰李翰章喬松年趙長齡並傳諭劉典何璟知之欽此

奏擒逆分股狂奔截剿疊勝摺

同治六年十月二十四日

奏爲擒逆竄入北山後分股狂奔官軍分路截剿疊獲勝仗現籌剿辦情形恭摺馳陳仰祈

聖鑒事

竊擒逆經大舉逼剿竄入北山兩獲小勝本月初五日以前情形業經臣等馳報是日已刻賊復由鄜州

境之隆坊吉子險一帶折向洛川東北竄擾記名提督劉厚基尋蹤掩擊行至距洛川十里安公村遇賊尾隊出其不意擊之斃髮賊數十名生擒滿髮賊八名訊稱前隊分起在前攻寨掠食劉厚基卽令其引路行至永鄉鎮霍家村見賊果分撲兩寨卽磨軍擊之陣斬賊五六十名前路地勢險狹官軍嚴陣追逼賊之墜崖死及經羣矛刺斃者不下二百餘名生擒賊目宋三元及運天福姚宗望等二十三名奪獲馬騾驢百餘匹大小旗幟八十四桿洋礮二十四桿餘賊奪路狂奔山谷皆滿訊據宋三元供山東濟甯人藍旗巨逆宋景詩之黨也今在張五黑黃旗內當頭目姚宗望係邱天將部下當頭目其洋礮則由回逆轉購而來逆衆因吉子險張村遍地荒草無從掠食故走此路覓糧訊畢斬之劉厚基方調分駐中部三營至洛川會隊初六夜諜賊已分兩股一由街子河一由舊縣均於前途合竄鄜州劉厚基卽夜馳向鄜州初七日抵鄜城始知初五日擊敗之賊是其分股其另股已於初五日竄到鄜州城外五里監軍臺比經劉厚基所部副中營四川補用副將劉厚填出隊迎擊劈山抬槍輪轟斃賊頗多槍礮止刀矛接殺斃悍賊十餘名奪獲大旗七桿戰馬九匹而賊來益衆官軍弁勇陣亡十餘名因而挫退入營捻逆隨圍劉厚填營盤并分撲州城東南二門經鄜州知州田景瀛儘先參將署都司張鵬程吏目孟振鈞督民團嬰城固守賊連撲十數次均經擊退悍賊旋衝入外城復經田景瀛督民團殺退相持一日一夜官軍力竭不支正危急間適劉厚基所部駐甘泉縣之左營赴鄜救援聞城中礮聲不絕比卽督隊由北門衝入一

面助守州城一面出隊掩擊賊始解圍敗竄復分三股一由任家台走府村一由道左鋪走甘泉一由牛武鎮走出家灣劉厚基正派隊追剿間忽有西路回土各逆數千乘機從羊圈大宜村撲鄆州城垣劉厚基仍留劉厚填副中營及由甘泉來援之左營都司曾祥萬副將劉文華率所部助鄆州防剿劉厚基卽於初八日進援甘泉縣行至道左鋪見騎賊數百排陣以待劉厚基飭各營留五成隊修築營壘五成隊出擊連放開花礮劈山礮斃賊數十奪獲大旗五桿賊且戰且奔劉厚基躡追至甄家灣破賊館數處正追剿間忽西路隔河馬步賊千餘蜂擁來援副將李作福首先衝擊連刃賊三名李作福旋被賊圍困身受數傷墜馬勇丁已傷亡數名劉厚基見官軍勢已難支卽帶馬隊衝入救出李作福槍礮連轟將賊擊退賊旋向甘泉竄出是夜五更劉厚基親率馬隊由間道馳赴甘泉初九日已刻行抵甘泉城外正值逆賊大股逼撲縣城復見劉厚基旗幟解圍遁走甘泉縣知縣魯學浩率團衆開礮轟擊賊復由甘泉縣城東八里之蟬溝入山竄東鄉清泉鎮劉厚基收隊入縣城小憩藉息兵力探報牛武鎮之賊已由麻子街竄走任家台之賊亦由府村竄走其地皆屬甘泉東鄉北可通延安府城南可通宜川縣城劉厚基擬隨賊所向擊之十二日由牛武鎮一帶追剿十四日卯刻抵宜川縣城而賊之前隊已於初十日竄至甘泉縣東之臨鎮宜川縣北之雲巖鎮並分股擾及宜川縣東北之蘭家哨劉厚基慮賊窺渡黃河或南竄韓城十五日移紮宜川城東五十里甘草坪扼之

臣宗棠前以韓城神道嶺及澄城北路空虛慮賊折而南

趨已飭總兵李南華率所部分扼神道嶺及各峪口而咨廣東提督劉松山壽春鎮總兵李祥和總兵郭寶昌各率所部全軍於十三日由白水洛川進宜川延川延長追剿恰與竄宜川之賊相值尙未接其到宜川續報此捻逆北竄鄜州甘泉均經官軍擊退解圍疊獲勝仗旋折由東南趨宜川縣境之實在情形也其西南另股捻逆勾結回逆之犯耀州者十三日回逆突至耀州城西三十餘里官莊十四日辰刻記名提督劉効忠潛師襲之賊知官軍有備遽向東北奪路入山而竄劉効忠收隊旋聞此股已竄州城北三十餘里黃鋪一帶劫去軍糧二千七百斤是夜五鼓劉効忠仍率八成隊伍馳往擊之追至黃鋪則賊又竄近同官縣城東南十餘里之宜興高村劉効忠督隊襲之斃賊約數百名奪獲騾驢數十其犯同官者十四日辰刻捻回數千合股紛竄縣城數里時高連陞總兵劉端冕已輕騎追賊至洛川各營半留宜君半留同官待調臣劉典已抵宜君縣屬苦泉所部除已撥三營赴防三水外餘僅留三成隊伍在耀州駐防同官副將范克復等商之署同官縣知縣王浩令左右兩哨會同臣劉典等所留隊伍迎剿范克復所部副將周萬祥自金鎖關聞警回援由南門出劉端冕所部副將譚同聲會督各營隊伍前往助剿槍礮連環轟擊斃賊數十忽騎賊數千由西原薨水衝至范克復率左右兩哨及親兵兩哨馳往接應步賊從左右兩山包抄而下周萬祥令左哨百長花翎守備謝元信從西原上令右哨百長花翎遊擊曹啟瑞從中路衝擊賊勢兇猛曹啟瑞被圍周萬祥往援相繼陣亡弁勇同時陣亡者二十九名受重傷二十四

名譚同聲突前手斬紅旗擒目一名忽飛子中腦當卽暈絕遊擊黃緒鴻接戰整隊相持至晚始克收隊

知縣王浩以擒回合勢賊數衆多飛稟

臣

劉典迅速回援

臣

劉典并飛致高連陞劉端冕馳回速剿十五

日辰刻親率隨身弁勇四百餘名折回金鎖關一面築壘一面派都司銜守備劉上吉馳諭同官各營留

存隊伍固守待援而文生喻鴻吉亦先日商之參將周萬國等將各營併作兩營以便固守是日申刻高

連陞所部正四營由宜川回抵金鎖關未暇傳餐卽空腹赴同援剿

臣

劉典以援兵已集城壘無虞劉効

忠又自南來賊必敗竄敗竄必由焦家坪苦無多兵可撥勉派親兵數十卽夜赴焦家坪設伏待之十六

日寅刻高連陞續派所部副四營及內外八哨親兵續回金鎖關

臣

劉典卽商派貴州候補同知洪惟善

同副前副右兩營赴同官協剿派副左副後營內外八哨及親兵隊徑赴焦家坪截擊黎明賊仍率隊攻

城范克復竭力堵禦高連陞所部提督銜總兵丁賢發從西寨之南進副將陳得勝總兵高有志均從西

寨之北進副將朱桂馥鄧玉魁及參將李國良從西寨之東北進槍礮齊轟刀矛並舉斃賊甚多賊拚死

回撲十餘次騎賊繞抄繼以步卒勢極兇狠丁賢發怒馬陷陣斃黃旗滿髮賊首一名正割取首級左

手爲賊槍子所傷各勇乘勝齊進賊遂大敗紛紛向北竄走官軍緊追斃悍賊數百馬驟倒地者無數賊

果由焦家坪竄走

臣

劉典率親兵數十名由金鎖關踰高嶺而進甫登嶺顛卽見賊隊紛竄中隔一溝遂

揚旗發號相併而行聞前途礮聲不絕知已得手適

臣

劉典所部總兵黃有功李大有率隊由中部續到